

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2010-mik, ataani allassimatut oqaasertalimmik, Inatsisartut tapersiinnaannik Inatsisartut aalajangiiffisassaattut siunnersuut:

Kisimiillutik pilersuisut atugaasa pitsanngorsarneqarnissaannut taperseeqqullugit Savalimmiuni Naalakkersuisut, Kalaallit Nunaanni Namminersorlutik Oqartussat aamma Islandimi Naalakkersuisut Nunat Avannarliit Killit Siunnersuisoqatigiiffiannit kaammattorneqarput. Ilaatigut isumassarsianik, ilisimasanik aamma misilittakkanik paarlaasseqatigiinnikkut aammalu ilaqtariit kisimiittunik pilersuisullit atugaasa qanoq pitsaanerpaamik pitsanngorsarneqarsinnaanerannik siunnersuutiniq saqqummiussinikkut naalakkersuisut pineqartut suleqataanissaat siunnersuisoqatigiit kaammattuutigaat. Alloriarnertut siullertut nunani avannarlerni killerni isumaginninnikkut naalakkersuisuusut isummanik iluatsittumillu suliniutinik paarlaasseqatigiiffiusumik ataatsimeersuartitsinissamik kaammattorneqarput.

(Aallartitat siulittaasuat Josef Motzfeldt)

pillugu

Ilaqtariinnermut Ataatsimiititaliap

ISUMALIUTISSIISUTAA

Siunnersuutip aappassaaneerreqarnerani saqqummiunneqartoq

Ilaqtariinnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit

Inatsisartunut ilaasortaq Jane Petersen, Inuit Ataqatigiit

Inatsisartunut ilaasortaq Astrid Fleischer Rex, Demokraatit

Inatsisartunut ilaasortaq Ruth Heilmann, Siumut

Inatsisartunut ilaasortaq Aleqa Hammond, Siumut

Siunnersuut Inatsisartunit ulloq 10. marts 2011-imi siullermeerneqareermat Ilaqtariinnermut Ataatsimiititaliamut sukumiinerusumik suliarineqartussanngortinneqarpoq.

Siunnersuutip imarisaa siunertaalu

Kisimiillutik pilersuisut atugaat pitsanngorsarneqarnissaasa isiginiarneqarnissaannik kaammattuutitut aalajangersakkami Islandimi, Savalimmiuni Kalaallillu Nunaanni Naalakkersuisut kaammattorneqarput. Tamanna pissaaq suleqatigiinnerup nukittorsarneqarneratigut, ilisimasanik misilittakkanillu avitseqatigiinnikkut kiisalu siullertut sammisaq pillugu ataatsimoorluni ataatsimeersuartitsinissamik suliniuteqarnikkut.

Nunani Avannarlerni Killerni kisimiillutik pilersuisut amerliartuinnartut, pissutsit immikkut eqqumaffiginarneqarnissaat siunnersuuteqarnermi tunngaviuvoq.

Siunnersuut Inatsisartuni siullermeerneqarnera

Siunnersuutip siullermeerneqarnerani Nunat Avannarliit Killiit Siunnersuisoqatigiiffiata kaammattuutitut aalajangersagaa 1/2010 partiinit tamanit Naalackersuisunillu tapersersorluarneqarpoq.

Ataatsimiititaliap siunnersuummik suliarinninnera

Meeqqat inuusuttullu atugarissaarnerinik peroriartornerminnilu atugaannik inuuniarnerminnilu atugassarisaannik Nunat Avannarliit Killiit suleqatigiinnermikkut eqqumaffiginninnerat soqutiginaruusoq ataatsimiititaliaq isumaqarpoq.

Nunat Avannarliit Killiit Siunnersuisoqatigiivisa kaammattuutitut aalajangersagaanni eqqarsaataasut tunngaviusullu tamakkiisumik ataatsimiititaliap taperserpai. Nunat Avannarliit Killiit pineqartumi suleqatigiissinnaappata misilittakkaminnik avitseqatigiissinnaappata iminnullu isumassarsiorfigisinnaappata taava tapersersornartorujussuussaaq. Siunnersuummut tunngavilersuummi ajornartorsiutit eqqarsaatersuutillu arlallit Kalaallit Nunaannut tunngatillugu Ilaqutariinnermut Ataatsimiititaliap ilisarinnava. Misissuinerit, oqallinnerit Inatsisartunilu siunnersuutit arlallit uppersarsarpaat kisimiillutik pilersuisut atugaat eqqumaniarfigineqartariaqartut. Savalimmiuni kisimiillutik pilersuisut eqqarsaatigalugit immikkut ajornartorsiutaasorinarpoq pineqartut aningaasaqarnikkut inissisimanertik pissutigalugu Savalimmiut qimattariaqartaraat.

Kalaallit Nunaanni pissutsit tunngavigalugit Kalaallillu Nunaanni piitsuussutsip annertusiartuinnartumut tunngatillugu pingaartumik meeqqat inuuniarnikkut atugaat pillugit ukiualunnguit matuma sionatigut MIPI-mit saqqummersinneqartoq pillugu nalunaarusiat immikkoortuisa aappaat Ilaqutariinnermut Ataatsimiititaliamit innersuussutigineqassaaq. Nalunaarusiami matumani Kalaallit Nunaanni ilaqutariit piitsuusut naatsorsueqqissaarinnermi ilisarnaataat erseqqissarneqarsimavoq. Taamalilluni nalunaarusiami taaneqartumi oqaatigineqarpoq pissuseq una ukuluunniit illoqutigiinni ilisarnaataagaangata meeqqanik pissakinnerusoqarnera ilimanarnerusartoq:

- illoqutigiinni inersimasuusut ukiui 25 inorlugit ukioqarpata
- **illoqutigiinni inersimasut kisimiittuuppata**
- illoqutigiinni meerartarineqartut amerlappata
- illoqutigiit nunaqarfimmiippata
- illoqutigiinni inersimasuusut tamarmik nunaqarfinni inunngorsimappata.

Soorlu erseqqaarissunngorlugu allanneqarsimasumi erseqqissarneqartoq illoqutigiinni kisimiilluni pilersuisoqaraangat aningaasaqarnikkut ajortumik inissisimalernissaq naatsorsueqqissaarnermi arlalinnik pissuteqarsinnaavoq.

Kisimiilluni pilersuisuuneq allanit akuleruffigineqartussaangilaq, tamannalu naalackersuinnikkut sulialinnit akuleruffigineqartariaqanngilaq. Akerlianilli Ilaqutariinnermut Ataatsimiititaliamit suliassaavoq kisimiittut inuuniarnikkut atugaasa, Nunani Avannarlerni Killerni atugarissaarnissamut periutsinut sinaakkusiussat pingaartumillu Nunani Avannarlerni Killerni aaqqissuussaannikkut pissutsit iluini, aningaasaqarnikkut illersorneqarsinnaasumik attatiinnarneqarnissaat nakkutigissallugit. Nunat Avannarliit Killiit ilaatigut ilisarnaatigaat siammasissunik mikisunillu inoqarfeqarnertik. Innuttaasut inuuniarnikkut atugaat pinngortitarlu avatangiiseralugu inuuniarnikkut atugassarititaasut aallaavigineqarnerat politikikkut eqqumaffigineqarnissaat Ilaqutariinnermut Ataatsimiititaliamut pingaaruteqarpoq.

Nunani innuttaasut aaqqissugaanikkut kultureqarnikkullu ataqatigiinnikkut pinngortitamillu pinngitsuuisinnaanginnermik pissuteqartumik assigiinngitsorpassuartigut immikkuullarissumik atassuteqarnermikkut Nunat Avannarliit Killiit Naalackersuisui misilittakkanik, isumassarsianik paasissutissanillu aamma siunissami suleqatigiissuteqartarlutillu paarlaasseqatigiittarumaartut Ilaqutariinnermut Ataatsimiititaliap ilimagaa. Kalaallit Nunaanni sumi najugaqarneq apeqqutaatinnagu ilaqutariit pilersuinissamut assigiimmik periarfissaqarnissaat Ilaqutariinnermut Ataatsimiititaliamut pingaaruteqarpoq.

Ilaqutariit atugarissaarnissaannut, qanoq aaqqissugaanerat apeqqutaatinnagu, suliffeqarnissaq pingaarutilittut naatsorsuutigineqartoq Ilaqutariinnermut Ataatsimiititaliamit erseqqissarneqassaaq. Atugarissaarneq suliffeqarnerlu ingiaqatigiipput avissaartinneqarsinnaanatillu. Atugarissaarneq suliffeqarfinni akulerutsitsinertalik pitsaasumillu suliffeqarnissamut periarfissat aaqqissuulluaraanni innuttaasut, ilaqutariit matumani ilanngullugit kisimiillutik pilersuisut pitsaanerusumik atugaqalernissaannut ammaassisuussapput. Nunani Avannarlerni Killerni allanisuulli suliffissaqartitsinarneq annertuumik unamminartuuvoq ilaqutariinnili atugarissaarnissamut imminullu pilersorsinnaanissamut pingaarutilittut piumasarisaasut siunnerfilimmik Nunani Avannarlerni Killerni Naalackersuisut suliniuteqaqqullugit Ilaqutariinnermut Ataatsimiititaliap kaammattussavai.

Naalackersuisut partiillu siunnersuut matumani ilanngullugu pineqartumi suliniutissatut saqqummiunneqartut tapersorsorsinnaagaat ataatsimiititaliap nuannaarutigalugu paasivaa.

Ilaqutariinnermut Ataatsimiititaliamit maluginiarneqarpoq aalajangiiffigisassatut siunnersuummi matumani alloriarneq siulleq taassaasoq sammisaq pillugu ataatsimeersuarnissaq. Nunat Avannarliit Killiit ullumikkut aningaasatigut atugassaasa

annikinnerat pissutigalugu ataatsimeersuarnermut aningaasaliissutissat naleqqussarneqartariaqarput. Aningaasartuutit Nunat Avannarliit Killiit Naalakkersuisuisa akornanni agguasarnermi najoqqutassiassaq isumaqatigiissutigineqareerpat missingersuusiorneqassapput.

Ataatsimeersuarnissamut aningaasat atugassat aningaasanut inatsisissami pingaartinneqarnissaa pisariaqarpoq.

Nunat Avannarliit Killiit Siunnersuisoqatigiiffiata kaammattuutit aalajangersagassaat siunnersuutit allat assigalugit Inatsisartut Suleriaasianni piumasarisaasut malillugit ilaatigut aningaasatigut kingunerisinnaasanik allaaserinnilluni suliarineqartarnissaat naggataatigut erseqqissarneqassaaq.

Inassuteqaat

Taama oqaaseqarluni aalajangiiffigisassatut siunnersuut ilusimisut iluseqartillugu akuersissutigineqassasoq Ataatsimiititaliap isumaqatigiittup inassutigaa.

Tamanna tunngavigalugu Ilaqutariinnermut Ataatsimiititaliap aalajangiiffigisassatut siunnersuut aappasaaniigassanngortippaa.

Debora Kleist
Siulittaasoq

Jane Petersen

Astrid Fleischer Rex

Ruth Heilmann

Aleqa Hammond